

Ī yu'xarij ti anaquéej jo'yú'xaca' a'íjna i San Pablo a'íimaj jimi i maj Tesalónica jo'cháatima'caa

Pablo pu hua'tyojtye'

¹ Nyáaj i nyáaj Pablo pué'een, a'íjna i Silvano ajta a'íjna i Timoteo, a'yaa tu já'muatyoytye' mua'ajmaj mu siaj Tesalónica ja'chej, i siaj siajta tyá'tzaahuatyé' i Dios jimi, siajta jimí tyámua' tyí'tyesejre' i tavástara' a'íjna i Jesús ti ajta Ciriístu' pué'een. Che' i Dios tyámua' tyajamuáacha'íin ajta jamuaatyápua'ritye'en ja'mua tzajta'.

Pablo pu jéehua tyé'tyojtzi're' i Dios

² A'náj tina'aj tu tyé'tyojtzi're' i Dios ja'mua jime', tyajta jamua'tamuá're'rii tyati'íjtá jahuocaj i Dios jimi.

³ A'náj tina'aj tu ja'tamuá're'rii je'ej ti jéehua i Dios tyámua' jamuáaruuj a'íjna jime' i siaj jitzán tyá'tzaahuatyé', siajta jéehua tyí'muarie' a'íjna jime' siaj jaxie've' siaj séecan huatyáhuire'en i Dios jimi, jéehua xu tyé'viicue' a'íjna jime' siaj jacho've' i tavástara' a'íjna i Jesús ti ajta Ciriístu' pué'een, a'íjna jitze ma'can i Dios.

⁴ Nye'ihuáamua' i nyaj jéehua já'muaxie've' i Dios jitze ma'can, tyámua'reej ti i Dios jamua'antyíhuoo.

⁵ Ji'nye tyati'ij jamuáa'ixaa i nyúucaria'ra' i Dios, catu a'yaa tyana'aj tyajamuáa'ixaa, sulu a'yaa tu tyajta huaríj je'ej ti tyé'ijta i júuricama'ra' i Dios tyajta a'íjna jime' i ti jin néijmi'i putyí'uurej, jéehua tu a'íjna jin tyé'tyojtzi're'. Tyámua' xu mua'aj tyá'mua'reej je'ej tyaj huaríj tyej tyij mua'ajmaj tyámua' jamuáa'uurej.

⁶ Siajta mua'aj, a'yaa xu huaríj je'ej tyaj tyajamuáa'ixaa, siajta a'yájna je'ej ti tyé'ijta i tavástara', siajta jáanamujri' i nyúucarij xuutyámua've'ej a'yájna je'ej ti tyajamuata' i júuricama'ra' i Dios a'íjna jime' i nyaj jin jajpuéjtzij.

⁷ A'íj xu tyámua' tyihuo'tá' a'íjma i maj tyá'tzaahuatye' i Macedonia maj já'ma'can, siajta i Acaya maj já'ma'can.

⁸ Capu a'áa na'aj já'namuajre' je'ej siaj mua'aj ricij, sulu néijmi'que' pu namuajre' je'ej siaj mua'aj ricij a'íjna jime' i nyúucaria'ra' i tavástara', a'yaa mu tyá'mua'reej siaj mua'aj ja'astej i nyúucaria'ra' i Dios, a'íj pu jin quee che' juxie've' tyaj ityáj tyihua'ixaatye'ej ja'mua jime'.

⁹ A'íi mu jujímua'aj jaataxájtaca' je'ej tyaj huaríj tyati'ij a'áa ja'rá'aj, ajta je'ej siaj mua'aj metyihuoohuá'xij i sánturij siaj sij a'íj hu- atyáhuire'en i ti jiré'can jime' Dios pué'een

¹⁰ siajta a'yan tye'ejchó've'ej ti ajtáhua'aj ya'uvé'nye' i tavástara' i ti yójra' pué'een i Dios, i ti ajta jaatájuurityej. A'íjna i Jesús a'íi pu a'íin pué'een i ti tíi'rátoosij tí'ij quee puéjtzij táaci'tyij.

2

Pablo pu jaxaj je'ej ti tyí'muarie' a'ájna a Tesalónica

¹ Siajta mua'aj nye'ihuáamua', tyámua' xu tyá'mua'reej tyaj quee huáapua'aj tyana'aj jamojo'vá'muaariaca'.

² Ajta a'yájna siati'ij seríj siajta tyá'mua'reej, anaquéej mu je'ej pua'aj táaruuj a'íimaj i Filipos maj ja'chej, Dios pu taatáhuu tyej tyij mua'ajmaj jamuaaté'exaatye'en i nyúucaria'ra', ajta ca'nyíjra'aj taatá' tyej tyij ca'nyíin jin huatyényo'se'en.

³ Ji'nye catu hue'tzij jin tyajamuáa'ixaa, catu tyajta a'íjna jime' tyej tyij je'ej pua'aj jamuáa'uurej, nusu tyej tyij tyi'tíj jin jamuáacuanamuaj.

⁴ Ajta ityájma, Dios pu ta'antyíhuo ajta taata'íj tyej tyij huó'ixaatye'en i nyúucaria'ra', a'íj tutyij jin tyajá'mua'ixaatye'. Catu a'yan tyá'huoo tyej tyij tyámua' tyihuo'tá'an i tyeítyee, sulu tyej tyij tyámua' tyaatá'an i Dios, i ti jamua'reej je'ej tyaj tyí'mua'tzej i tatzájta'.

⁵ A'yájna siati'ij mua'aj seríj tyá'mua'reej tyej quee a'náj nyúucarij jin tyajamuáa'ixaa ti naa huánamuajrii, catu tyajta a'yan tyá'huoo tyej tyij a'íjna jin tyi'tíj ancuriáan. Dios pu jamua'reej tyaj tzáahuatyí'ra'aj jin a'yan ricij.

⁶ Catu tyajta jahuoo mej mij séecan naa tojo'sejra, tìpua'aj mua'ajmaj jimi nusu séecan jimi.

⁷ Tyij quee i'ríitacaj tyaj a'yan huárinyiiche' a'íjna jime' ti i Ciríistu' ta'antyíhuo, ajta

ityáj catu a'yan huaríj, sulu tyámua' tu tyaja-muáacha'ij. A'yájna tí'ij i hua' náanaj i tí'ríij tyámua' tyihuá'cha'ij i juyójmua',

⁸ a'yaa tu jéehua tyaja'muaxie've' mua'ajmaj, capu a'yaa na'aj tyita'ránajchaca' tyaj a'íj jamuaaté'exaatye'en i nyúucaria'ra' i Dios, sulu tyej tyajta huá'cui'nyij ja'mua jitze ma'can. A'yaa tu jéehua tyaja'muaxie've'.

⁹ Ta'ihuáamua', mua'aj xu jamua'reej tyaj jéehua tyu'muáriej, tyajta jaapuéjtzitariaca'. Jéehua tu tyu'muáriej tújca tyajta tíca', tyej tyij quee a'tíj huatamuárie'riste'en tyati'ij já'mua'ixaatya'ca'aj i nyúucaria'ra' i Dios.

¹⁰ Mua'aj xu tyámua' naa tyá'mua'reej, a'yájna tí'ij ajta i Dios tyá'mua'reej, tyej tyámua' naa tyi'tyítacha'íij ja'mua jimi mu siaj tyá'tzaahuatye', catu a'tíj je'ej pua'aj huáruuj, catu tyajta tyi'tíj jin ootyá'ítzee.

¹¹ A'yaa xu siajta tyá'mua'reej tyaj jéehua ca'nyíjra'aj jamuaatá' tyajta tyámua' tyajamuae-tyéeje séej tyajta séej, a'yájna tí'ij tyihuá'itíij i hua' táataj i juyójmua'.

¹² A'yaa tu tyajta tyajamuaa'íjca siaj sij tyámua' tyityetyúucha'íij a'yájna mati'ij i maj i Dios jimi séejre', ji'nye a'íi pu a'íin pué'een i tí jamuaatajé, siaj sij a'áa ja'rá'astij jo'tij a'íin tyejé'ijtaj.

¹³ A'íj tu jin ityáj a'náj tina'aj tyé'tyojtzire' i Dios, ji'nye siati'ij mua'aj jáanamujri' i nyúucaria'ra' i Dios, i tyaj jamuáa'ixaa, a'yaa xu tya'ancuriáa' tí'ij Dios nyuUCAAJ, caxu a'yan tya'ancuriáa' tí'ij i tyétyacaa nyuUCAAJ. A'yaa pu

tyi'ja'yájna ti nyúucaria'ra' pu'éen i Dios, a'íi pu tyámua' jamuáaruuj i ja'mua tzajta' mu siaj tyá'tzaahuatye'.

14 Siati'ij mua'aj ta'ihuámua' jaa-puéjtzitariaca' i ja'muatyeítyeristyamua' jimi, a'yaa pu cha'tána'aj tyihuó'ruuj a'íijma i maj Judea jo'cháatimee, i maj majta jusi'rii u tyeyúuj tzajta' mej mij jaatyáanajche i Dios, i maj majta i Ciríistu' jitze ajtyáma'can, ji'nye a'íi mu majta jajpuéjtzica'aj a'íijma jimi i juxa'aj tyeítyee i maj Judea já'ma'can.

15 A'íi mu a'íin pu'éen i maj jaajé'caj i tavástara' ti ajta Jesús pu'éen, a'yájna mati'ij majta tyihuo'cuii a'íijma i maj Dios jitze ma'can tyí'xajtaca'aj, a'íi mu majta taatamuárij ityájma. Camu tyé'tyojtzi're' i Dios, majta mu hua'ajcha'íire' néijmi'caa i tyeítyee,

16 ji'nye tyati'ijtá tyihuá'ixaatya'mui'ij a'íimaj i maj quee Israel jitze ajtyáma'can, ti'ij ajta huó'huiire'en, camu a'íimaj tatá'caa tyaj a'yan huárinyij. A'yaa mu mij tyá'mue'tij ti i Dios jéehua puéjtzij huo'tá'an. Ajta ta'aj ij hu-atyáapua'rej a'íjna, Dios pu arí jéehua puéjtzij huo'ta'.

Pablo pu jaxie've' ti ajtáhua'aj huojo'vá'muaarej i Tesalónica maj ja'chej

17 Ta'ihuámua', tyati'ij ajtacíj ja'mua jimi, catu majamuuhuá'xij, tyij tyajta quee já'muasejraca'aj, a'náj tina'aj tu mua'ajmaj jitze tyí'mua'ajcaa, tyajta a'yan jéehua tyá'xie'va'ca'aj tyaj jamojo'tyéesej.

18 A'yaa tu tyu'tatyésej tyaj a'áa ja'tanyéj, nyajta nyáaj Pablo mue'tíj nu a'yan tyá'xie'va'ca'aj nyaj a'áa ja'tanyéj, ajta i tyiyáaru' pu tyi'tyánaamuaaj.

19 Ji'nye, ¿a'tanyíj a'ín pué'een i tyaj jin tyi'ijchó've', i tyaj jin tatyamua've', ajta i tyaj jin á'tatzaahuatye'en a'ájna xicáara' jitze tí'ij uvé'nyej i tavástara' tí ajta Jesús pué'een? Típua'aj sequée mua'aj a'ín pué'eenye', capu máaj a'tíj a'ín pue'éenye'ej ta'mej.

20 A'yaa pu tyi'ja'yájna, mua'aj xu a'ín pué'een i tyaj jin á'tatzaahuatye' siajta i tyaj jin tatyamua've'.

3

1 Aj tutyij tyati'ij quee che' je'ej huaríj, a'yaa tu tyaaxá'pui'intarej tyaj tajímua'aj a'áa jo'tyá'itzeere'en a'ájna a Atenas

2 tyajta je'en a'íj huata'ítyaca' i ta'ihuáara' Timoteo i tí tajamuán tyí'muarie' i Dios jimi, tyej tyij huo'té'exaatye'en i nyúucaria'ra' i Ciríistu', a'yaa tu een jime' jaata'ítyaca' ja'mua jimi tí'ij ca'nyíjra'aj jamuaata'an a'íjna jitze i siaj jitzán tyá'tzaahuatye',

3 ajta tí'ij quee huatóoxaahuataj a'íjna jime' i sij jin jajpuéetzij. Ji'nye mua'aj xu a'yan tyá'mua'reej tí a'yan tyúuxie've' siaj a'yan tyaapuéjtzitarej.

4 Ajta, tyati'ij tyooj a'áa jo'tyá'caj ja'mua jamuán, a'yaa tu tyajamuáa'ixaa tyaj a'yan tya'ajpuéetzij ta'me'nyíche', a'yaa pu'ij tyu'ríj, siati'ij seríj tyá'mua'reej.

⁵ A'íj nu jin, nyati'íj quee che' pu jáaruuj nyaj a'áa ja'tanyéj, a'yaa nu tyu'ta'íjtaca' mej mij tyajamuaata'íhuo' nyej nyij jáamua'reej je'ej ti tyajá'muahuiiria'ca'aj a'íjna jime' i siaj jitzán tyá'tzaahuatye', ji'nye a'yaa nu tyi'tziinya'ca'aj ti i tyiyáaru' tyi'tíj jin jamuaatamuárie'riste'en siaj sij quee che' tyá'tzaahuatye'ej ajta ti'íj quee che' tyi'tíj huiiria'aj já'ra'nyij i tyaj jin tyu'muáriej ja'mua jimi.

⁶ Ajta i Timoteo pu'ríj yará'aj a'áa ti ja'rájraa ja'mua jimi, a'yaa pu tyitaaté'exaaj siaj tyámua' een a'íjna i siaj jitzán tyá'tzaahuatye' ajta je'ej siaj tyihúa'xie've' i séecan. A'yaa pu tyitaaté'exaaj siaj jéehua ta'tamuá're'rii, siajta jéehua jaxie've' siaj taaséj, a'yájna tyati'íj tyajta ityáj tyá'xie've' tyaj jamuaaséj.

⁷ A'íj tu jin, ta'ihuáamua', tyij ajta jéehua tyi'tatyese'ihuaritye' tyajta taxaamuíjritye', jéehua tu huátatyamua'vej tyati'íj jáamua'reeri' siaj siooj tyámua' naa tyá'tzaahuatye'.

⁸ Tyati'íj a'yan tyáamua'reeri' siaj siooj tyá'tzaahuatye' i tavástara' jimi, jéehua pu ca'nyíjra'aj taatá' i tatzájta'.

⁹ ¿Ji'nye tyí'rij tyej tyij jéehua tyaatatyójtzi're'en i Dios a'íjna jime' i tyaj jin tatyamua've' jimi, mua'ajmaj jime'?

¹⁰ Tújca tyajta tíca' a'yaa tu tyá'huavíj i Dios ti taatá'an tyej tyij tyajtáhua'aj jamuaaséj, tyajta jamuaatáhuire'en tyaj janéijmi're'en i ti jamuá'itziitye' i siaj jin tyá'tzaahuatye'.

¹¹ A'yaa tu jéehua tyá'xie've' ti i Dios i tyaj jajvástara', ajta a'íjna i tavástara' i Jesús, maj

a'ñin taatáhuire'en tyej tyij a'áa ja'tanyéj ja'mua jimi.

¹² Che' ajta i tavástara' jamuáave'sij siaj sij jéehua huóoxie've'en séej siajta séej, siajta huo'xié've'en néijmi'caa i tyeítýee, a'yájna tyati'ij ityáj tyaja'muaxie've'.

¹³ Ti ajta tyámua' jamuáa'uurej i já'muatzajta', siaj sij quee tyi'tíj jin á'itzeeria'aj i Dios jimi i tyaj jajvástara' a'ájna ti'ij uvé'nyej i tavástara' i Jesús, jamuán i maj tyí'huire' u tajapuá. Che' a'yan tyá'ra'nyij.

4

I júuricamej ti ja'ráanajchi i Dios

¹ Ajta ijíj ta'ihuámua', a'yaa tu tyaja'muahuavij tyajta a'yan tyajá'mua'ijcatye' a'ájna jitze ma'can i tavástara' Jesús, siaj a'náj tina'aj tyámua' eenye' siajta tyámua' tyityetyúucha'ij a'yájna siati'ij tyaari'rej ityájma jimi, siaj sij tyaatatyójtzi're'en i Dios, a'yájna siati'ij seríj ricij.

² Mua'aj xu'ríj jamua'reej je'ej tyaj tyajamuáa'ixaa jitzán ma'can i ti jin tyi'tyéjvee i tavástara' Jesús.

³ A'yaa pu i Dios tyá'xie've' siaj tyámua' eenye', tiquee a'tíj juxana'ciria'aj

⁴ a'yaa pu tyúuxie've' ti síj ajta síj tyámua' tyéecha'ñin i jutyévíj, ti'ij tzáahuatyí'ra'aj jin séjre'ej,

⁵ tiquee a'yan rijcaj je'ej ti jusíj tyá'xie've' tyi'tíj jime' ti quee xá'puí', a'yájna mati'ij ricij i tyeítýee i maj quee jamua'tyej i Dios.

⁶ Che' quee a'tíj tyi'tíj jin a'yan rijcaj, ajta quee juxana'ciria'aj jamuán íra'ra'an i juxa'aj tyéviij, ji'nye tavástara' pu jéehua puéjtzij jaatá'sij a'tíj ti a'yan ricij, a'yaa tu tyerij tyeemi' tyajamuáa'ixaa.

⁷ Ji'nye capu i Dios a'íjna taatajé tyej tyij je'ej pua'aj éenye'que' séjre'ej, sulu tyej tyij ji're'nye'ej séjre'ej i tatzájta'.

⁸ A'yaa pu'ij, a'íjna i tiquee tyá'tzaahuatye' je'ej tyaj tyajá'mua'ixaatye', capu a'íj ma'úuhua'xij i huá'nyuucaa i tyétyacaa, sulu a'íj pu quee á'tzaahuatye' i Dios i ti ju júuricamej jamuaatá' ti'ij ja'mua tzajta' séjre'ej.

⁹ Ajta a'íjna jime' i siaj jin huóoxie've'en i siaj ju'ihuáamua', capu juxie've' tyaj a'íjna jin tyajá'muayu'se'ej, ji'nye Dios pu arí jamuaamua'tyej je'ej siaj tyityahuóoxie've'en séej jamuán siajta séej.

¹⁰ A'yaa xu mua'aj ricij a'íjna jime' siaj hua'xie've' i ju'ihuáamua' i maj a'áa jo'cháatimee néijmi'que' a'áa ti huaca'aj a Macedonia. Tyajta ityáj, a'yaa tu tyaja'muahuavij ta'ihuáamua' siaj jéetze' huóoxie've'en.

¹¹ Siata'aj juxáahuaj naa tyí'tyechajcaj setyi'muárie'ej i jumuáca' jime' je'ej ti tyi'tíj tyaac'íj séej ajta séej, a'yájna tyati'ij tyerij tyajamuaa'íjca,

¹² mej mij i maj quee tyá'tzaahuatye' jamuaatyátzaahuatye'en, ajta ti'ij quee tyi'tíj jamuá'itziitye'ej.

Ti'ij uvé'nyej i tavástara'

13 Ta'ihuámua', catu jaxie've' siaj quee jamua'reérej je'ej ti tye'mej a'íimaj jimi i maj meríj huácuij, siata'aj quee juxaamuijritya'aj mati'ij i séecan, i maj quee jacho've' i tavástara'.

14 A'yájna tyati'ij tyá'tzaahuatye' ti i Jesús huamuí' ajta je'en huatájuuriaca', a'yaa tutyij tyajta tyá'tzaahuatye', ti i Dios huo'tájuuritye'ej i Jesús jamuán a'íijma i maj huácuij jimi metya'tzáahuatye'ej.

15 A'íj tu jin a'yan tyajámua'ixaatye' i tavástara' jitze ma'can tijin, ityáj i tyaj júurij a'yan huatyá'itzeere'ej íiyan i cháanacaj japua, catu anáatya'aj tá'ju'un a'íijma jimi i maj meríj huácuij.

16 Ji'nye nyúucarij pu huatánamuajre ti'ij tyu'ta'íjtaj, a'yaa pu ajta tyu'tánamuajrej ti'ij a'tíj ti ca'nyíin tyu'táci'sitye'en a'ájna jo'tij i Dios já'sejre', aj pu'ij i tavástara' aje'cányesij a jútye'. Majta i maj huácuij metya'tzáahuatye'ej i Círíistu' jimi, a'íi mu anaquéej huatájuuritaj,

17 tyajta je'en ityáj, i tyaj júurij a'yan séejre' i cháanacaj japua, a'íi pu ajta tá'vi'tin i jéetirij tza-jta' hua' jamuán i maj moochán huatájuuriaca', tyej tyij ja'antynájchej i tavástara' i jéetirij tza-jta', a'yaa tutyij jusén jin tyeje'séeria'aj tá'ju'un i tavástara' jamuán.

18 A'íj xu jin, siata'aj ca'nyíjra'aj huatóoa'an a'íjna jime' i nyúucarij i nyaj jamuáa'ixaa.

5

1 Ajta a'íjna jime' a'tzáaj ti uvé'nyesij i tavástara' nusu a'náj ti huataséjre'sij,

ta'ihuáamua', capu juxie've' tyaj a'íjna jin tyajá'muayu'se'ej.

² Tyámua' xu mua'aj naa tyá'mua'reej ti a'ájna xicáara' ti jitzán uvé'nyesij i tavástara', a'áa pu a'yan tye'mej siati'ij pua'aj quee jacho've', a'yaa pu tyu'taséjre'sij ti'ij náhua'rij ti utyárutyij tíca' jo'siaj ja'chej.

³ Mati'ij i tyeítyee a'yan tyí'xajtaj tijin: “Capu che' tyi'tíj je'ej ricij, pu'ríj tyu'puá'riajraa”, aj pu'ij a'ájna atyojo're'nyesij i xicáara' maj jitzán antyipua'rij, a'yájna ti'ij íitaj ti ootacu'nyej, capu huatáa'riitarij maj huatóo'uunaj.

⁴ Siajta mua'aj, ta'ihuáamua', caxu tíca'riste' séejre', a'íj pu jin quee a'yan tye'mej ja'mua jimi ti'ij náhua'rij ti utyájrutyey jo'siaj ja'chej, a'ájna xicáara' jitze ti'ij tavástara' uvé'nyej.

⁵ Néijmi'i xu mua'aj a'íjma jimi ajtyáma'can i maj a'áa já'sejre' jo'tíj jó'nyeeri'ij i Dios jimi. Catu hua' jitze ajtyáma'can i maj tíca'riste' jó'juhua'an, nusu jo'tíj quee jó'nyeeri'ij,

⁶ a'íj tu jin quee a'yan rinyij mati'ij i séecan i maj a'yan séejre' mati'ij i maj cu'tzuj, sulu tyiche' atanyéjnye'rij tyajta tyámua' metyityoomuámua're'ej.

⁷ A'íimaj i maj cu'tzuj, a'yaa mu tíca' tyí'tyacu'cuj, majta i maj juta'rujve', a'íi mu majta tíca' juta'rujve',

⁸ tyajta ityáj, nyéeri'iste' tyaj ciinyej, a'yaa pu tyúuxie've' tyaj a'náj tina'aj tyámua' eenye'. Tyiche' huátacha'íin, a'íjna jime' i tyaj jin tyá'tzaahuatye' i tavástara' jimi tyajta huátaxie've'en, tyiche' tyajta a'íjna jin avátanaj

ì tyaj jin jacho've' ti ì Dios tiì'rátoonyij.

⁹ Ji'nye capu ì Dios a'íjna jin ta'antíhuo tyej tyij jajpuéetzij tá'ra'nyij, sulu ti'ij táahuiire'en a'íjna jitze ma'can ì tavástara' Jesús ti ajta Ciriistu' pué'een.

¹⁰ A'íi pu tajitzé ma'can huamuí', tyej tyij júurij tá'ra'nyij jamuán ì tavástara', tìpua'aj ì tyaj júurij, na'ríij ì maj meríj huácuij, néijmi'i tu jimí huatyá'ítzeere'ej jusén jime'.

¹¹ A'íj xu jin ca'nyíjra'aj huatóoa'an séej siajta séej, a'yájna siati'íj seríj ricíj.

Je'ej maj tyityetyúucha'íj ì maj tyá'tzaahuatye'

¹² Ta'ihuáamua', a'yaa tu tyaja'muahuavíj siaj tyámua' tyihuá'ajcha'íj a'íjma ì maj ja'mua jimí tyí'muarie', ì maj majta a'íjna jin antyúumua'reej maj tyajamuaamuá'tyej je'ej ti tyá'xie've' ì tavástara'.

¹³ A'yaa pu tyúuxie've' siaj jéehua huo'xié've'en, a'íjna jime' ì maj tyí'muarie' ja'mua jimí. Tyámua' xu huojomua'raj séej siajta séej.

¹⁴ A'yaa tu tyajta tyajá'mua'ijcatye', ta'ihuáamua', siaj tyámua' huó'uurej a'íjma ì maj quee xá'puí' ricíj, siajta ca'nyíjra'aj huo'tá'an a'íjma ì maj quee juca'nyej ì juxiéjnyu'caa tzajta', siajta huo'táhuire'en a'íjma ì maj quee tyámua' ricíj, siajta néijmi'caa á'cu'vaj.

¹⁵ Tyámua' xu'uj mua'aj ti'ij quee a'tíj je'ej pua'aj ja'uurej ì juxa'aj tyévíj. Sulu siata'aj a'náj tina'aj tyámua' eenye', a'yájna siati'íj jujíimua'aj

tyityetyúucha'ij siajta a'yan cha'taj siana'aj tyityetyúucha'ij néijmi'caa jimi i maj a'yan séejre' i cháanacaj japua.

16 A'náj tina'aj xu jutyamua've'ej.

17 Siajta a'náj tina'aj jahuoocaj i Dios jimi.

18 Néijmi'i xu jin tyé'tyojtzi're'ej i Dios, ji'nye a'yaa pu tyá'xie've' ja'mua jime' i siaj tyá'tzaahuatye' i Ciríistu' jimi i ti ajta Jesús pué'een.

19 Caxu já'je'cataj i júuricama'ra' i Dios.

20 Caxu jaxaahuataj a'íjna i siaj Dios jitze ma'can tyihuo'té'exaatye'en.

21 Siata'aj anaquéej tyámua' tyáamua'reej tyi'táj ti xá'puí' nusu i ti quee siajta je'en a'íj huatyátzaahuatye'en i ti xá'puí'.

22 Xa'ajtáciinyij a'íjna jitze i ti je'ej pua'aj een.

23 Che' a'íi cha'tána'aj i Dios, a'íjna i ti jamuaatyápua'rityej, che' a'íin tyámua' jamuáa'uurej, siaj sij quee tyi'táj jin á'itzeeria'aj i ja'muaxiéjnyu'caa tzajta', nusu ja'muamua'tziira'aj jitze, na'ríij i ja'muatyévij jitze, a'ájna xicáara' jitze ti'ij uvé'nyesij i tavástara', a'íjna i Jesús ti ajta Ciríistu' pué'een.

24 A'íjna i ti a'íjna jin jamuaatajé, capu tyi'táj jin á'itzeere', a'íi pu ajta néijmi'i jin aróo'astej.

Hua'tyojtye' i ti jin ja'antypuá'ritye'ej

25 Ta'ihuáamua', siata'aj siajta ityájma jime' jahuoocaj i Dios jimi.

26 Sياهو'tatyójtje' néijmi'caa i ta'ihuáamua'.

27 A'yaa nu tyajá'mua'ijcatye' i tavástara' jitze ma'can, siaj jo'jívje'en a'íjna i yu'xarij néijmi'caa jimi i ta'ihuáamua'.

28 Che' i tavástara' Jesús i ti ajta Ciríistu'
pué'een, che' a'íin tyámua' tyajamuáacha'íin.

Cora, Santa Teresa
Cora, Santa Teresa: I nyúcarij ti jájcua ti a'ijna
á'xaj i Tavástara' i Jesús ti Ciriistu' pue'een ajta
Salmos New Testament+

copyright © 2016 Wycliffe Bible Translators, Inc.

Language: Cora, Santa Teresa

Contributor: Wycliffe Bible Translators, Inc.

All rights reserved.

2025-05-01

PDF generated using Haiola and XeLaTeX on 30 Apr 2025 from source
files dated 1 May 2025

4f03662f-a4e0-5c7c-a13b-0b7002b5b8f6